

UNE FEDERAZION AUTONOMISTE TRA LIS REGJONS ALPINIS

Nissun in chest mont nol è tant puar di no podê fâ promessis: nancje il guvier talian. E par dî la veretât a'nd à fatis simpri un grum: promessis solenissimis, confermadis cun disposizions di leç, cun ratifichis internazionâls. O fevelin culi di chês che a forin fatis sul cont des popolazions di confin e des minorancis etnichis.

Dal 1866, cuant che il Venit e il Friûl a forin unîts ae Italie, il guvier talian al garantive che intai paîs di lenghe slave (Resie e Cjanâl dal Nadison) e sarès stade insegnade la lenghe materne intes scuelis publichis.

Tal 1920, la leç dai 26 di setembar, n. 1322, e declarave che "il guvier dal re al jere autorizât... a publicâ lis disposizions che a coventavin par coordinâ lis leçs dal Stât talian cu la legjislazion che e jere in vigôr intai teritoris liberâts e in particolâr cu lis lôr autonomiis provinciâls e comunâls".

Tal 1921, cuntun articul di leç e un discors de Corone, al vignive prometût al Trentin e Bas Tirôl il mantigniment des lôr autonomiis. Di chestis promessis nancje une no je stade mantignude.

Za fa cualchi mê, cuntun articul de Costituzione, al fo ricognossût il dirit de Regjon trentine e dal Friûl a un ordenament autonomistic speciâl. Chê altre di la autonomie speciâl dal Friûl, cuntune scuse cualunche e vignive rimandade sine die, e chê dal Trentin e Bas Tirôl, cul statût imbastît a Rome, e vignive ridusude a une ridicule parvence.

Pratindi che chestis puaris popolazions di confin, che a son simpri in pericol, che a son lis plui esponudis a dutis lis batiduris e a ducj i berdeis internazionâi a puedin crodi ancjemò aes promessis dal guviers di Rome al vûl dî pratindi che a vebin dât a fit il lôr cjast!

O vin capît ducj, da un cjâf a chel altri dal arc alpin, che la bestie burocratiche e fâs di dut par parânus ator, par mantignînus intes cjadenis di un ordenament umiliant e anacronistic, sot lis sgrifis de camore foreste che e regne in cjase nestre.

E alore, se chel fregul di autonomie che si à domandade nus ven ancjemò dineade; se Rome, come il so solit, nus da une freolade o nus bute une grampe di fen par podê metinus daspò la musolarie, ce nus restaressial di fâ?

O lassìn la peraule a F. Bertoldi ripuartant il struc di ce che al scrîf sul setemanâl autonomistic trentin ("La nostra autonomia" dai 2 di dicembar).

"Lis stradis a son dôs: o la ribelion o la conquiste pacifiche... Si po scometi che doman no'ndi vorès tropis a disturbâ la calme dai prefets, dai capos division o dal ministeri, e il lôr spavent al deventarès disperazion se cualchi centrâl eletriche e saltàs par aiar... Ma chest nol sucedarà... parcè che noaltris o vin il cjâf a puest e parcè che o vin une altre strade une vore plui spaventose pal Leviatan di Rome: chê des leghis tra regjons di confin... Lis popolazions de Ligurie Intemelie, de Val d'Aoste, de Valteline, dal Trentin, dal Tirôl, dal Friûl, de Sclavanie, che a son za unidis inte Federazion de int alpine a puedin fâ un bloc cuintri la burocrazie centrâl: la lôr solidarietât e sarès une arme plui tremende che no une esplosion che e fasarès plui mâl a nô che no a chei di Rome.

Cheste federazion e je ancjemò pôc cognossude: al è un pat fintremai cumò pitost platonic e di pocje ativitât, ma al esist, al à un fundament e une directive programatiche; al po deventâ doman il puint di comant par guidâ la barcje des autonomiis speciâls. E se une sole regjon no po dâ trop fastidi a Rome, il Trentin, il Bas Tirôl, la Valteline, la Ligurie Intemelie, la Val d'Aoste (e ancje la Slovenska Demokratska Zveza, che e semee pronte a intindisi cun nô) a formaressin insiemit une fuarce tâl di meti ben in pinsîr i ufizis dal Centri. Dute int di confin, int positive che no cognos idolatriis nazionalistichis e aversions siovinistichis; dute int di montagne, ferme e risolude, usade a tignî dûr cence pôre e cence premure!

Cheste e je la strade che o vin di cjapâ. Fin cumò al è stât fat pôc, ma lis direzions dai moviments autonomistics a àn di pensâ a cheste pussibilitât pacifiche inte forme, ma formidabil inte sostanzie".

josef marchet - Patrie dal Friûl / 1947